



NEWSLETTER

OLIMPIJSKOG KOMITETA BIH



No. 36, maj/jun/jul 2026



Poštovane sportašice i sportaši,
Poštovani prijatelji,

U proteklom periodu smo obilježili još jednu godišnjicu osnivanja naše institucije i poželjeli dobrodošlicu Antoniu Tomiću na mjesto generalnog tajnika Olimpijskog komiteta Bosne i Hercegovine.

Aktivno radimo na unaprjeđenju suradnje sa bh. institucijama nadležnim za sport, a naš rad na međunarodnoj sceni potvrđen je učešćem na 55. Općoj skupštini Europskih olimpijskih komiteta.

Posebno se ponosimo obilježavanjem Olimpijskog dana koji je ove godine održan u Sarajevu u suradnji sa Sportskim igrama mladih.

Suradnja sa sportskim savezima BiH i dalje je intenzivna i usmjerena na unaprjeđenje sportskog sistema Bosne i Hercegovine.

Čestitam savezima i sportistima na nizu uspjeha koji su postignuti u proteklom periodu. Posebno želim najaviti da nas u narednom augustu i septembru očekuje učešće mnogobrojne delegacije Bosne i Hercegovine na Mediteranskim igrama Taranto 2026. Vjerujem da će naši sportaši dostojno predstavljati zemlju i potvrditi rastući potencijal bh. sporta na međunarodnoj sceni.

Nastavljamo aktivno sudjelovati u EU projektima te se radujemo budućim izazovima i suradnjama.

Hvala svima koji svojim radom i podrškom grade kvalitetniju i inkluzivniju olimpijsku zajednicu.

S poštovanjem,

Davor Komšić
Predsjednik Olimpijskog komiteta Bosne i Hercegovine

GODIŠNJICA OSNIVANJA OLIMPIJSKOG KOMITETA BOSNE I HERCEGOVINE



Prije 34 godine, 04. juna 1992. osnovan je Olimpijski komitet Bosne i Hercegovine. Za prvog predsjednika izabran je g-din Stjepan Kljuić, a osnivačku skupštinu je kao prvi predsjedavajući rukovodio Ahmed Karabegović. U radu su sudjelovali i sportski lideri poput Uglješe Uzelca i Izudina Filipovića, uz predstavnike 20 sportskih federacija, sportskih radnika, novinara i stručnjaka.

Nakon prvog nastupa naših sportista na Olimpijskim igrama u Barceloni 1992. godine, Međunarodni olimpijski komitet je 24. septembra 1993. u Monaku zvanično priznao OK BiH. Godine 2002. Komitet je upisan u registar Ministarstva pravde i time postao krovno sportsko tijelo zemlje. Grb Komiteta osmislio je akademski slikar Mersad Berber.

Olimpijski komitet BiH, kao član MOK-a, obavezao se poštovati pravila Olimpijske povelje, Statuta MOK-a, Etičkog kodeksa MOK-a, Svjetskog anti-doping kodeksa, zajedničke Izjave iz Lozane, Zakona o udruženjima i fondacijama BiH te Zakona o sportu Bosne i Hercegovine.

Na Osnivačkoj skupštini OK BiH okupili su se predstavnici 20 sportskih federacija – predstavnika olimpijskih sportova, ugledni sportski radnici, predstavnici sportskih novinara, sportskih ljekara i pedagoga fizičke kulture: Mehmed Sokolović, Petko Radović, Dezider Jurišić, Vasilije Morović, Mirsad Fazlagić, Burazor Slavko, Ahmed Karabegović, Mersad Berber, Miroslav Šipek, Davorin Popović, Mirza Delibašić, Memnum Idžaković, Stevica Krsmanović, Branislav Crnogorac, Ale Hasanbegović, Zdenko Brož, Uglješa Uzelac, Čedo Gojković, Dragan Nožica, Mladjen Talić, Faruk Talić, Marko Petrović, Enes Terzić, Izudin Filipović, Stjepan Kljuić, Namik Terzimehić, Ismet Arslanagić, Muhamed Masleša i Manojlo Čalija.

Na ovoj Skupštini izabrani su članovi Izvršnog komiteta OK BiH: Mirza Delibašić, Mirsad Fazlagić, Čedo Gojković, Ahmed Karabegović, Dragan Nožica, Ante Raos, Mehmed Sokolović, Miroslav Šipek i Katica Šporer. Za članove prvog Nadzornog odbora izabrani su: Muhamed Mujić (predsjednik), Vlatko Hrgić i Dako Radošević (članovi).

OK BiH nastavlja posvećeno razvijati sport, promicati fair play i štititi olimpijske vrijednosti.

ANTONIO TOMIĆ PREUZEO DUŽNOST GENERALNOG TAJNIKA OLIMPIJSKOG ODBORA BOSNE I HERCEGOVINE



U prostorijama Olimpijskog komiteta/ Olimpijskog odbora Bosne i Hercegovine predsjednik OK BiH, g. Davor Komšić, potpisao je menadžerski ugovor sa novoizabranim generalnim tajnikom/ sekretarom OK BiH, g. Antoniom Tomićem, koji je i zvanično preuzeo dužnost rukovođenja stručnom službom ove institucije.

Tom prilikom predsjednik Komšić istakao je važnost kontinuiranog razvoja i

prilagođavanja savremenim potrebama sportskog sistema.

„Kao što je to praksa u olimpijskim institucijama širom svijeta, a tome svjedočimo i u zemljama našeg okruženja, s vremena na vrijeme javlja se potreba za kadrovskim osvježenjima. Modernizacija, fleksibilnost i samoodrživost sustava moraju biti u fokusu budućeg djelovanja Olimpijskog odbora BiH. Čestitam novom generalnom tajniku na izboru i želim mu puno uspjeha u radu. Također, želim izraziti zahvalnost dosadašnjem generalnom tajniku, gospodinu Saidu Fazlagiću, koji je tijekom posljednja tri mandata pokrenuo brojne procese i postavio kvalitetne temelje koji će omogućiti njihovo daljnje unaprjeđenje“, izjavio je Komšić.

Novoizabrani generalni tajnik/sekretar Antonio Tomić zahvalio je na ukazanom povjerenju, naglasivši da će svoj mandat usmjeriti ka unaprjeđenju rada institucije i jačanju podrške bosanskohercegovačkom sportu.

„Zahvaljujem se na ukazanom povjerenju. Siguran sam da ćemo zajednički pronaći najbolja rješenja i primijeniti kvalitetne prakse koje će doprinijeti budućem funkcioniranju Olimpijskog odbora BiH. Spreman sam raditi u skladu s planovima, odlukama i smjernicama organa OO BiH te organizirati učinkovit rad stručne službe uz osiguravanje kvalitete, pravodobnosti i zakonitosti u njezinu djelovanju. Posebnu zahvalnost upućujem dosadašnjem generalnom tajniku, gospodinu Saidu Fazlagiću, na višegodišnjem predanom radu. Uvjeren sam da preuzimam uređenu i stabilnu instituciju koja predstavlja dobru osnovu za daljnji razvoj. Jedan od prioriteta bit će stvaranje kvalitetne radne i međuljudske atmosfere među zaposlenicima, jer samo zajedničkim radom možemo ostvariti još bolje rezultate u radu Olimpijskog odbora BiH, a sve s ciljem razvoja sporta, posebno vrhunskog sporta. Također, uvijek ću biti otvoren za suradnju sa svima koji iskreno žele doprinijeti napretku bosanskohercegovačkog sporta. Moji ključni ciljevi bit će povećanje broja sportaša, sportašica i ekipa Bosne i Hercegovine na olimpijskim igrama i drugim velikim višesportskim natjecanjima te stvaranje uvjeta za osvajanje olimpijskih medalja“, poručio je Tomić.

Imenovanje novog generalnog tajnika/sekretara predstavlja početak novog razdoblja djelovanja Olimpijskog komiteta Bosne i Hercegovine, s posebnim fokusom na modernizaciju rada, jačanje institucionalnih kapaciteta i stvaranje što boljih uslova za razvoj sporta i ostvarivanje vrhunskih sportskih rezultata na međunarodnoj sceni.

OK BiH I MINISTARSTVO SIGURNOSTI BOSNE I HERCEGOVINE JAČAJU SARADNJU U INTERESU SPORTA



U prostorijama Olimpijskog komiteta Bosne i Hercegovine održan je sastanak predsjednika OK BiH Davora Komšića i vršioca dužnosti ministra sigurnosti Bosne i Hercegovine Ivice Bošnjaka, na kojem su razmatrana pitanja od ključnog značaja za razvoj sporta u Bosni i Hercegovini.

Sastanak je organizovan s ciljem unapređenja saradnje između Olimpijskog komiteta BiH i institucija

Bosne i Hercegovine, te predstavljanja aktivnosti i izazova s kojima se susreće krovna sportska organizacija u našoj zemlji.

Predsjednik OK BiH Davor Komšić zahvalio se ministru Bošnjaku na posjeti i spremnosti da sasluša potrebe sportskog sektora, ističući važnost snažnije institucionalne podrške sportu i sportistima Bosne i Hercegovine. Tokom razgovora poseban akcenat stavljen je na unaprjeđenje zakonskih rješenja koja uređuju oblast sporta, kao i na pronalaženje održivog modela finansiranja vrhunskog sporta i Olimpijskog komiteta BiH.



Tom prilikom predsjednik Komšić uručio je ministru Bošnjaku inicijativu koja obuhvata podršku u procesu izrade novog i unaprjeđenja postojećeg zakonodavnog okvira na državnom nivou, intenziviranje saradnje sa institucijama Bosne i Hercegovine, te rješavanje pitanja redovnog sufinansiranja Olimpijskog komiteta BiH iz budžeta institucija BiH.

Jedna od važnih tema sastanka bila su i pitanja iz oblasti sigurnosti sportskih događaja i međunarodne sportske saradnje. Razgovarano je o procedurama ulaska i boravka stranih sportista u Bosni i Hercegovini tokom međunarodnih takmičenja, saradnji u procesima dodjele državljanstva sportistima, kao i o mehanizmima djelovanja u slučaju potencijalnih sigurnosnih prijetnji sportskim manifestacijama i sportskom sistemu u cjelini.

Ministar Bošnjak izrazio je zadovoljstvo posjetom Olimpijskom komitetu BiH te naglasio da prepoznaje značaj sporta za promociju Bosne i Hercegovine i razvoj društva. Istakao je da je svjestan izazova s kojima se suočava sportski sektor, te da će u okviru svojih nadležnosti pružiti podršku inicijativama koje doprinose stvaranju boljih uslova za rad sportskih organizacija i vrhunskih sportista. Kompletanu vijest pročitajte na linku [OVDJE](#).

PREDSJEDNIK OO BIH DAVOR KOMŠIĆ SUDJELOVAO NA 55. OPĆOJ SKUPŠTINI EVROPSKIH OLIMPIJSKIH KOMITETA



Predsjednik Olimpijskog odbora Bosne i Hercegovine Davor Komšić sudjelovao je na 55. Općoj skupštini Europskih olimpijskih odbora (EOC), održanoj u Budimpešti, koja je okupila predstavnike nacionalnih olimpijskih odbora iz cijele Europe, međunarodnih sportskih organizacija i ključnih partnera olimpijskog pokreta. Tijekom dvodnevnog zasjedanja razmatrane su najvažnije teme vezane uz budućnost europskog sporta, razvoj olimpijskog pokreta i jačanje suradnje među nacionalnim olimpijskim odborima.

Predsjednik Komšić je, osim sudjelovanja u radu Opće skupštine, iskoristio priliku za ostvarivanje i dodatno unaprjeđenje suradnje s kolegama iz drugih nacionalnih olimpijskih odbora, kao i s glavnim tajnicima iz Europe i regije. Razmjena iskustava, jačanje partnerskih odnosa i razgovori o zajedničkim projektima predstavljaju važan segment međunarodnog djelovanja Olimpijskog odbora Bosne i Hercegovine.


Drugoga dana Opće skupštine poseban naglasak stavljen je na suradnju Europskih olimpijskih odbora i Europske unije, pri čemu je potvrđena zajednička predanost očuvanju europskog sportskog modela i daljnjem razvoju sporta na svim razinama. Kompletnu vijest možete pročitati na [ovom linku](#).

KOMISIJA SPORTISTA OK BIH: USVOJENA DEKLARACIJA SPORTISTA

Komisija sportista Olimpijskog komiteta Bosne i Hercegovine (OKBiH) održala je sjednicu na kojoj je jednoglasno usvojena [Deklaracija sportista](#), dokument koji definira prava i odgovornosti sportista unutar olimpijskog pokreta.

Deklaracija naglašava temeljna prava sportista, među kojima su nediskriminacija, pristup poštenom i transparentnom sportskom okruženju, pravovremene i jasne informacije, obrazovanje i mogućnost kombiniranja sporta s radom ili studijem, mogućnost ostvarivanja prihoda vezano za ime i lik, rodna ravnopravnost, zaštita mentalnog i fizičkog zdravlja, pravo na privatnost i slobodu izražavanja, kao i pravo na pravičan postupak i zaštitu od odmazde pri prijavi neetičkog ponašanja.

Također, Deklaracija iznosi odgovornosti sportista, potičući poštovanje olimpijskih vrijednosti, borbu protiv dopinga i manipulacije takmičenjima, poštivanje kodeksa etike, zakona i pravila takmičenja, solidarnost unutar Pokreta olimpizma te obavezu sudjelovanja u procesima predstavnitva i disciplinarnim postupcima kada je to potrebno.



ISTORIJSKI ISKORAK ZA REGION WESTERN BALKAN SPORT DIPLOMACY HUB



Predsjednik Olimpijskog komiteta Bosne i Hercegovine Davor Komšić učestvovao je na konferenciji „Sportska diplomatija: politike, prakse i buduće mogućnosti“ na kojoj je ostvaren istorijski iskorak za region osnivanjem Western Balkan Sport Diplomacy Huba. Događaj je organizovao Olimpijski komitet Sjeverne Makedonije u Skoplju.

Pored Komšića, na skupu su bili predstavnici olimpijskih komiteta iz Sjeverne Makedonije, Crne Gore, Bugarske, Kosova i Albanije; više od 15 ambasadora i predstavnika ambasada iz zemlje i regiona; te predstavnici Ministarstva vanjskih poslova i vanjske trgovine, državnih institucija, akademske zajednice i sportskih organizacija.

Vrhunac programa bilo je potpisivanje Deklaracije o osnivanju Regionalnog huba za sportsku diplomatiju, zajedničke platforme koja će ujediniti olimpijske komitete radi jače saradnje i zajedničkog predstavljanja na evropskoj i svjetskoj sceni.

Ključni ciljevi koji će biti integrisani u rad platforme su jačanje regionalne saradnje kroz inicijative sportske diplomatije; izgradnja kapaciteta NOC-ova, sportskih saveza i mladih profesionalaca; osiguranje zajedničkog glasa Zapadnog Balkana u evropskim i međunarodnim sportskim forumima; promovisanje rodno osjetljive diplomatije i ženskog liderstva u sportu; iskorištavanje sportskih događaja za razvoj turizma i lokalne ekonomije; te podrška istraživanju, prikupljanju podataka i izradi politika u oblasti sportske diplomatije. Organizatori navode da ovo nije bila samo konferencija, već početak novog poglavlja u kojem sport postaje pokretač diplomatije, partnerstava, institucionalnog jačanja i regionalnog razvoja.

SIMPOZIJUM „SPORT U ERI VJEŠTAČKE INTELIGENCIJE - SPORT, ETIKA I IZVRSNOST“ OKUPIO STRUČNJAKE



U organizaciji Olimpijskog komiteta Bosne i Hercegovine održan je Simpozijum pod nazivom „Sport u eri vještačke inteligencije, sport, etika i izvrsnost“, koji je okupio ugledne akademike, stručnjake iz oblasti sporta, medicine i informacionih tehnologija, kao i predstavnike sportskih saveza iz Bosne i Hercegovine i regiona.

Cjelodnevni program bio je posvećen primjeni vještačke inteligencije u sportu, etičkim izazovima savremenih tehnologija, unaprjeđenju sportskih organizacija, ali i medicinskim aspektima razvoja sporta u digitalnom dobu.

Program je počeo jutarnjim radionicama za generalne sekretare sportskih saveza o praktičnoj primjeni AI tehnologija u svakodnevnom radu sportskih organizacija. Učesnici su bili podijeljeni u dvije grupe, a radionice su vodili Zlatko Ganić, Alisa Bašić i Nazif Hasanbegović. Posebna pažnja bila je posvećena korištenju AI alata, pisanju promptova i implementaciji vještačke inteligencije u administrativne i organizacione procese sportskih saveza.

Zvanični dio Simpozijuma otvorio je predsjednik Olimpijskog komiteta BiH Davor Komšić pozdravnim govorom.





Jedno od najzapaženijih predavanja održao je akademik Asim Kurjak, koji je govorio o povezanosti nauke i sporta kroz praktičnu primjenu postulata vještačke inteligencije. Akademik Velimir Srića fokusirao se na izazove koje AI donosi društvu i sportu, dok je akademik Almir Badnjević otvorio pitanje može li vještačka inteligencija unaprijediti sport bez gubitka ljudskosti i autentičnosti sportskog duha.

O medicinskim aspektima savremenog sporta govorio je prof. dr Edin Begić kroz predavanje o evaluaciji fibroze srčanog mišića, dok je akademik Lejla Gurbeta Pokvić predstavila mogućnosti i prve korake primjene vještačke inteligencije u sportskim sistemima. Akademik Goran Krstajić govorio je o odnosu života, sporta i zdravlja srca u eri AI tehnologija, a akademik Mirza Žižak postavio je pitanje da li je vještačka inteligencija u sportu samo alat ili postaje autoritet.

Simpoziju su prisustvovali i čelnici Olimpijskog komiteta Srbije, predsjednik Dejan Tomašević i generalni sekretar Dejan Bojović.

Simpozijum je još jednom potvrdio da sport i tehnologija sve snažnije djeluju zajedno, ali i da će etika, ljudski faktor i odgovorna primjena novih tehnologija ostati ključni izazovi budućeg razvoja sporta.

PROMOVISANA KNJIGA „PROMJENE AI I HRM U SPORTU“ AKADEMIKA PROF. DR IZETA RAĐE

U okviru završnog dijela Simpozijuma „Sport u eri vještačke inteligencije, sport, etika i izvrsnost“, koji je okupio ugledne akademike, stručnjake iz oblasti sporta, medicine i informacionih tehnologija, kao i predstavnike sportskih saveza iz Bosne i Hercegovine, održana je promocija knjige „PROMJENE AI I HRM U SPORTU, laboratorija dobrih praksi Olimpijskog komiteta Bosne i Hercegovine“, autora akademika prof. dr Izeta Rađe.

Knjiga predstavlja jedinstven spoj savremenih tehnologija, upravljanja ljudskim resursima i olimpijskih vrijednosti, oslanjajući se na iskustvo i praksu Olimpijskog komiteta Bosne i Hercegovine kao laboratorije promjena. Publikacija se bavi savremenim trendovima upravljanja ljudskim resursima u sportu, s posebnim fokusom na uticaj vještačke inteligencije na razvoj sportskih organizacija, njihove procese rada

i buduće modele upravljanja. Autor kroz knjigu analizira izazove i mogućnosti koje donosi digitalna transformacija sporta, naglašavajući važnost edukacije kadrova i odgovorne primjene AI tehnologija u sportskim sistemima. Promocija je održana u prostorijama Olimpijskog komiteta Bosne i Hercegovine – Zetra, Sarajevo, uz prisustvo brojnih predstavnika akademske, sportske i stručne zajednice.

Cijeli tekst pročitajte na linku [OVDJE](#).



OLYMPIC DAY 2026: „YOU CAN DO THIS. LET’S MOVE“



Olimpijski komitet Bosne i Hercegovine, u saradnji sa Sportskim igrama mladih, organizovao je manifestaciju „Olympic Day 2026“ s ciljem promocije olimpijskih vrijednosti, zdravog načina života i važnosti bavljenja sportom među djecom i mladima.

Na ovogodišnjem događaju učestvovalo je 200 osnovaca iz cijele Bosne i Hercegovine. Poseban doprinos manifestaciji dala je saradnja sa Sportskim igrama mladih, najvećom regionalnom amaterskom sportskom manifestacijom, koja kontinuirano promoviše prijateljstvo, inkluziju, fair-play i zdrav način života.

Program je započeo simboličnim zagrijavanjem, nakon čega su djeca, pod nadzorom trenera i sportskih saveza, rotirala kroz osam sportskih stanica: stoni tenis, badminton, košarka, između dvije vatre, frizbi, atletika, karling i ragbi. Na svakoj stanici učestvovalo je između 15 i 20 djece kroz interaktivne sadržaje i praktične demonstracije.

Predsjednik Olimpijskog komiteta BiH Davor Komšić poručio je mladima da vjeruje u njihov uspjeh.

„Ja sam 100 posto siguran da ćete vi svi ovdje doći do vrhunskih rezultata i Olimpijskih igara.“

Komšić je istaknuo da će učesnici s ovog Olympic Day-a i Sportskih igara mladih ponijeti „najljepše uspomene u životu“ te ih pozvao da slušaju roditelje, trenere, nastavnike i profesore.

„Najvažnije — slušajte roditelje, trenere, nastavnike i profesore i cilj i rezultati neće izostati.“



Mladi su se družili i sa bh. olimpijcima, među kojima su bili najbolji atletičar Amel Tuka, džudistkinja Larisa Cerić, skijašica Elvedina Muzaferija i biatlonka Sanja Kusmuk, koji su svojim prisustvom dodatno motivirali učesnike.

Ovogodišnje izdanje nosi globalnu poruku Međunarodnog olimpijskog komiteta „You Can Do This. Let’s Move.“ (Možeš to. Pokrenimo se.), koja poziva djecu i mlade da vjeruju u svoje sposobnosti i kroz kretanje razvijaju samopouzdanje, otpornost i osjećaj zajedništva.

Na kraju programa svi učesnici pozirali su za zajedničku fotografiju koja simbolizuje temeljne olimpijske vrijednosti – prijateljstvo, poštovanje, izvrsnost i zajedništvo – te važnost aktivnog i zdravog života.

Cilj Olimpijskog komiteta Bosne i Hercegovine ostaje širenje olimpijskog duha širom zemlje kroz aktivnosti koje povezuju sport, obrazovanje i društvenu odgovornost. Olympic Day, koji se od 1948. obilježava u više od 200 država i teritorija, i ove godine je potvrdio svoju ulogu najveće globalne inicijative za promociju univerzalnih olimpijskih vrijednosti.

Olympic Day se održava u 206 država svijeta pod jurisdikcijom Međunarodnog olimpijskog komiteta i podršku Olimpijske solidarnosti.



LARISA CERIĆ U POSJETI OK BIH: „NE PLANIRAM STATI, CILJ SU OLIMPIJSKE IGRE U LOS ANGELESU!“



Jedna od najuspješnijih bosanskohercegovačkih sportašica, olimpijka i istaknuta judašica Larisa Cerić posjetila je Olimpijski komitet BiH, gdje je s predsjednikom Davorom Komšićem razgovarala o dosadašnjim uspjesima, izazovima i planovima za nastavak svoje bogate sportske karijere.

Poseban naglasak stavljen je na novi olimpijski ciklus i mogućnost nastupa na Olimpijskim igrama Los Angeles 2028.

„Ne planiram stati. Ukoliko mi zdravstveno stanje to dozvoli i uspijem sanirati probleme s ramenom, cilj mi je ponovno ostvariti olimpijsku normu i izboriti nastup na Olimpijskim igrama u Los Angelesu 2028.“ – poručila je Larisa.

Želimo Larisi mnogo sreće i uspjeha na putu ka novim sportskim izazovima. Vjerujemo da najbolje tek dolazi!

OLIMPIJSKI KOMITET BIH UPRILIČIO PRIJEM ZA NEJRU SIPOVIĆ, OSVAJAČICU TITULE GRAND WINNER 2026

U junumjesecu je održan sastanak predstavnika OK BiH i Karate saveza BiH povodom povijesnog uspjeha bh. reprezentativke Nejre Sipović.

Sastanku su nazočili predsjednik OK BiH Davor Komšić i generalni tajnik Antonio Tomić, dok su Karate savez BiH predstavljali predsjednik Zdenko Klepić, generalni tajnik Admir Zukan, trener Zijad Sipović i najbolja bh. karatistica Nejra Sipović. Predsjednik Olimpijskog komiteta BiH Davor Komšić čestitao je Nejri Sipović, pozdravljajući nazočne u ime Predsjedništva OK BiH, koje uz njega čine Vico Zeljković i Izet Rađo. Komšić je upoznao nazočne s aktualnim promjenama u radu OK BiH, uključujući nedavnu rotaciju na dužnosti predsjednika i imenovanje novog generalnog tajnika Antonia Tomića.



„Želimo donijeti novu energiju i dodatno unaprijediti rad Olimpijskog komiteta BiH. Naš je cilj da sportaši budu u središtu pozornosti, da stvaramo bolje uvjete za njihov razvoj te povećamo broj predstavnika Bosne i Hercegovine na Olimpijskim igrama i drugim velikim višesportskim natjecanjima. Uspjesi poput Nejrinog potvrđuju da Bosna i Hercegovina ima vrhunске sportaše koji zaslužuju veću potporu i veću vidljivost u javnosti“, istaknuo je Komšić. Zahvaljujući na prijemu, Nejra Sipović istaknula je kako je titula Grand Winner rezultat dugogodišnjeg rada, odricanja i kontinuiteta vrhunskih nastupa na najvećim svjetskim natjecanjima.

SPORTSKI SAVEZI **BOSNE I HERCEGOVINE**

ODBOJKAŠKI SAVEZ BIH | SASTANAK OK BIH I ODBOJKAŠKOG SAVEZA



U prostorijama Odbojkaškog saveza BiH održan je sastanak između predsjednika OK BiH i predstavnika Odbojkaškog saveza BiH, predsjednice gđe Anite Glibić, člana Upravnog odbora g. Darka Kasapa i tehničkog sekretara g. Dine Bećiragića.

Tokom sastanka predsjednik Komšić upoznao se sa radom Saveza, izazovima sa kojima se susreću u svakodnevnom djelovanju, kao i planovima razvoja u narednom kratkoročnom i dugoročnom periodu.

Razgovarano je o unaprjeđenju saradnje, podršci razvoju odbojke u Bosni i Hercegovini i zajedničkim aktivnostima koje će doprinijeti jačanju sportskog sistema i boljim uslovima za sportiste i saveze.

Na kraju sastanka doneseni su zajednički zaključci koji će biti smjernica za buduću saradnju i nastavak partnerskog djelovanja OK BiH i Odbojkaškog saveza BiH.

RAGBI SAVEZ BIH | USPJEŠNO ZAVRŠEN CROSS - BORDER PROJEKAT



U proteklom periodu Ragbi savez Bosne i Hercegovine realizovao je aktivnosti u okviru projekta prekogranične suradnje s ekipama iz regije. Projekt je fokusiran na ženski ragbi, a u suradnji s partnerskim ekipama organizirana su tri zajednička kampa na kojima su mlade ragbijašice unaprijedile svoje vještine.

Kampovi su održani u Zagrebu, Zenici i na Vlačiću. Kroz implementirane aktivnosti naše igrice su zajedno s ekipama iz Hrvatske, Srbije i Mađarske imale priliku unaprijediti ragbi znanje i tehniku, te razvijati suradnju i razmjenjivati iskustva u novim područjima.

SPECIJALNA OLIMPIJADA BOSNE I HERCEGOVINE POVEZALA GRADOVE, PARTNERE I SPORT KROZ GLOBALNU SEDMICU INKLUZIJE

Tokom Globalne sedmice inkluzije u Bosni i Hercegovini, Specijalna olimpijada BiH i brojni partneri pretvorili su gradove, muzeje, sportske terene i trgove u prostore poruke jednakosti i uključenosti.

Sarajevo je simbolično pustilo 500 crvenih balona i osvijetlilo Olimpijski muzej, Mostar je bakljama na Starom mostu i skokom poslao poruku inkluzije, a Goražde, Tuzla (Tuzlanski 5K) i prihvatni centar Lipa organizovali su lokalne aktivnosti koje su povezale različite zajednice.



Program je okupio javne institucije, kompanije (BH Telecom, Monri, LED Media, SCC) i međunarodne organizacije (IOM, UNFPA, World Vision), potvrđivši da inkluzija zahtijeva zajedničku odgovornost. Fokus ostaje na sportistima Specijalne olimpijade čiji rad pokazuje da inkluzija nije jednokratni događaj, već proces građenja jednakih prilika; najvredniji rezultat su trajna partnerstva i društvo u kojem svi imaju mjesto.

Globalna sedmica inkluzije završena je, ali partnerstva koja je okupila ostaju njen najvrjedniji rezultat. Upravo u tome leži najveća snaga Specijalne olimpijade Bosne i Hercegovine – da kroz sport povezuje ljude, gradi povjerenje i pokazuje da najveća pobjeda nije osvojena medalja, već društvo u kojem svako ima priliku da bude dio tima. Kompletnu vijest pročitajte [OVDJE](#).

TAEKWONDO SAVEZ BIH | BIH PREDSTAVNICI IMENOVANI U ODBORE EVROPSKE TAEKWONDO FEDERACIJE

Predsjednik Taekwondo saveza Bosne i Hercegovine za olimpijski taekwondo gosp. Samir Šarić imenovan je za potpredsjednika Odbora za članstvo Evropske taekwondo federacije (ETU), generalni sekretar Taekwondo saveza Bosne i Hercegovine gosp. Vedran Ćubela za člana Odbora za takmičenja Evropske taekwondo federacije, dok je tehnički sekretar Taekwondo saveza Bosne i Hercegovine Mirela Mujović imenovana u Odbor "Taekwondo za sve" Evropske taekwondo federacije.



Ova značajna imenovanja predstavljaju veliko priznanje za Bosnu i Hercegovinu, ali i potvrdu kontinuiranog kvalitetnog rada, stručnosti i međunarodnog ugleda predstavnika Taekwondo saveza Bosne i Hercegovine unutar evropske sportske zajednice.

TRIATLON I PENTATLON SAVEZ BIH | ODRŽAN GREEN LAKE TRIATHLON - DRŽAVNO PRVENSTVO U OLIMPIJSKOM TRIATLONU 2026



Održano je IV izdanje Green Lake Triatlona, jednog od najznačajnijih triatlonskih događaja u Bosni i Hercegovini. Ovogodišnje takmičenje imalo je poseban značaj jer je u okviru manifestacije održano i Državno prvenstvo Bosne i Hercegovine u olimpijskom triatlonu.

Više od 50 takmičara iz Bosne i Hercegovine i inostranstva nadmetalo se u olimpijskoj i sprint distanci, pruživši brojnim posjetiocima vrhunska sportska uzbuđenja u jedinstvenom ambijentu Jablaničkog jezera.

Titulu državnog prvaka Bosne i Hercegovine u olimpijskom triatlonu osvojio je Belmin Godinjak, koji je na taj način uspješno odbranio naslov osvojen prošle godine, dok je u ženskoj konkurenciji državna prvakinja ponovo postala Anđela Talić, također potvrdivši dominaciju i odbranivši titulu najbolje triatlonke Bosne i Hercegovine. U sprint triatlonu najbrži je bio Igor Isanović, a u ženskoj konkurenciji prvo mjesto osvojila je Hanych Zlatoslava.

Predsjednik Triatlon kluba Feniks i organizator događaja Jasmin Harbinja izrazio je zadovoljstvo uspješno realizovanim takmičenjem.

“Iza nas je još jedno izuzetno uspješno izdanje Green Lake Triatlona. Posebno smo ponosni što smo ove godine bili domaćini Državnog prvenstva Bosne i Hercegovine u olimpijskom triatlonu i što smo imali priliku ugostiti najbolje triatlonce naše zemlje. Zahvaljujem se svim takmičarima, volonterima, partnerima i institucijama koje su podržale organizaciju događaja. Vjerujemo da će Green Lake Triathlon nastaviti rasti i u godinama koje dolaze”, istakao je Harbinja.

Organizatori ističu da je događaj realizovan uz podršku Triatlon i pentatlon saveza Bosne i Hercegovine, Grada Konjica na čelu sa gradonačelnikom Osmanom Čatićem, Federalnog ministarstva okoliša i turizma, kao i Vlade Hercegovačko-neretvanskog kantona.

Green Lake Triathlon još jednom je potvrdio svoj status jednog od vodećih triatlonskih događaja u Bosni i Hercegovini, okupljajući sportiste, rekreativce i ljubitelje sporta u jedinstvenom ambijentu Lisičića i Jablaničkog jezera.

SAVEZ DIZAČA TEGOVA BIH | DRŽAVNO SENIORSKO PRVENSTVO



Krajem mjeseca maja u Građevinsko-geodetskoj školi održano je Seniorsko prvenstvo Bosne i Hercegovine u olimpijskom dizanju tegova. Uz pojedinačno seniorsko Prvenstvo održano je i prvo kolo ekipnog prvenstva (muški, ženski i mješoviti).

Pobjednici u ženskoj konkurenciji po kategorijama su 58 kg: Sarah Durak (Barbell Club); 63 kg: Nives Ostrošić (Barbell Club); 69 kg: Hana Suljević (Željezničar); 77 kg: Melina Bašimamović (Željezničar); +86 kg: Amina Mašić (IsANEH).

Pobjednici u muškoj konkurenciji po kategorijama su 60 kg: Georgije Bogoević (IsANEH); 71 kg: Faris Durak (Željezničar); 79 kg: Luka Madunić (Kreševo); 88 kg: Zerin Kobilić (Željezničar); 94 kg: Andranik Karapetyan (Željezničar); 110 kg: Nemanja Ćosić (Student Banja Luka) — srebro; +110 kg: Bojan Vještica (Student Banja Luka) — srebro; 110 kg: Yasser Salem (Željezničar); +110 kg: Mak Numić (Željezničar).

Najuspješniji takmičar po Sinclair bodovima, viceprvak Europe, Andranik Karapetyan, dok je najuspješnija takmičarka Sarah Durak. Najuspješniji klub Državnog prvenstva je KDT Željezničar.

Ekipni plasman — 1. kolo:

Muški pobjednik: KDT Željezničar

Ženski pobjednik: KDT Barbell Club

Mješoviti pobjednik: KDT Željezničar

Kompletnu vijest i rezultate pročitajte [OVDJE](#).

SAVEZ DIZAČA TEGOVA BIH | PRIJEMI



Nakon Evropskog prvenstva viceprvak Europe Andranik Karapetyan bio je službeno primljen uz delegaciju: Haris Durak (trener reprezentacije), Adel Muratović (doktor reprezentacije) i Ante Madunić (direktor reprezentacije). Prijeme su upriličili, između ostalih:

- Ministrica civilnih poslova BiH Dubravka Bošnjak;
- Ministar kulture i sporta KS Kenan Magoda;
- Načelnici općina Stari Grad, Centar i Novi Grad: Irfan Čengić, Srđan Mandić i Semir Efendić.

SPORTSKO-RIBOLOVNI SAVEZ BIH | KONTINUITET VRHUNSKIH REZULTATA: ZAVRŠENO 30. EUROPSKO PRVENSTVO U MUŠIČARENJU U MOSTARU I LIVNU

Bosna i Hercegovina je od 22. do 28. lipnja 2026. godine još jednom dokazala da je veliko središte sportskog ribolova. Uspješnom organizacijom 30. Europskog prvenstva u mušičarenju (Fly Fishing), naša zemlja je po drugi put u svojoj povijesti ugostila najbolje europske ribolovce, potvrđujući status vrhunskog domaćina i destinacije s nevjerojatnim prirodnim potencijalima. Natjecanje su u partnerstvu s krovnom Svjetskom federacijom FIPS-Mouche organizirali Sportsko-ribolovni savez BiH te lokalni klubovi domaćini iz Mostara i Livna. Ključnu ulogu u pripremi i realizaciji ovog zahtjevnog projekta imao je predsjednik Saveza i međunarodni organizator natjecanja Danijel Kobačić, čijim je angažmanom osigurana vrhunska tehnička i logistička razina prvenstva. O kompleksnosti same organizacije najbolje govori podatak da je u cijeli projekt bilo uključeno preko 150 sudaca i organizatora.

Novi blistavi trenutak bh. sporta osigurao je reprezentativac Aleksandar Đukić, koji je nakon pet zahtjevnih natjecateljskih sesija osvojio zlatnu medalju i naslov individualnog prvaka Europe. Ekipno, reprezentacija Bosne i Hercegovine turnir je završila na visokom 5. mjestu u iznimno jakoj konkurenciji.

Nastavak bogate tradicije i vrhunskih uspjeha
Sportski ribolov u Bosni i Hercegovini već desetljećima niže sjajne rezultate na međunarodnoj sceni. Naša zemlja iza sebe ima bogatu povijest i organizaciju velikih natjecanja poput 35. Svjetskog prvenstva u Jajcu (gdje je BiH osvojila povijesnu ekipnu broncu), Svjetskog prvenstva za juniore u Mostaru, te 21. Svjetskog prvenstva "SPIN" u Kiseljaku i Busovači. Iz te bogate tradicije i rasta, u kojoj Bosna i Hercegovina pamti i povijesne svjetske te europske prvake iz ranijih godina, proizašao je i najnoviji podvig na rijekama i jezerima Hercegovine i Livanjskog kraja.

Lokacije i 20 zemalja sudionica

Natjecanje se odvijalo na tri vrhunske staze: na rijeci Buni (Blagaj/Mostar), rijeci Sturbi (Livno) te Mostarskom jezeru. Na Prvenstvu je sudjelovalo točno 100 natjecatelja iz 20 reprezentacija.



BH • TEAM

ČESTITKE ZMAJEVI!



Olimpijski komitet Bosne i Hercegovine od srca čestita Nogometno/Fudbalskoj reprezentaciji BiH, selektoru i kompletom rukovodstvu NS BiH na viteškom predstavljanju zemlje, 4 teško izvojevane bitke izvan početnih očekivanja, te izvanrednom ukupnom dojmu na ovom SP. Temelje koje je zadnjih godina postavio NS BiH na čelu sa predsjednikom g. Vicom Zeljkovićem daje veliku nadu u mnogo godina sreće i uzbuđenja koje će nam priuštiti ovaj mladi i perspektivni nogometni tim.

Idemo još jače dalje prema Evropskom prvenstvu...

DAMIR DŽUMHUR PLASMAN U FINALE ATP TURNIRA

Plasman u finale ATP turnira u Umagu još je jednapotvrda kvaliteta, upornosti i vrhunskog sportskog duha Damira Džumhura. Sjajnim igrama tokom cijelog turnira dostojno je predstavio Bosnu i Hercegovinu na međunarodnoj teniskoj sceni.

Iako je naslov izmakao, Damir je u finalu pružio dostojanstven otpor i još jednom pokazao srce šampiona. Na ovakvim nastupima gradi se put ka novim uspjesima i još većim sportskim dostignućima.

Čestitamo na sjajnom turniru i želimo mnogo sreće u nastavku sezone. Bosna i Hercegovina je ponosna!



Foto: Plava Laguna Croatia Open Umag / Merlo de Graia

MESUD PEZER - ČETVRTA POBJEDA U BARU



Mesud Pezer je hicem 19,97 metara (1119 bodova) osvojio Trofej „Boro Ičević“ što je sjajan povratak nakon pauze. Ovo je Mesudova četvrta pobjeda u Baru!

Trideset drugo izdanje Međunarodnog atletskog mitinga BAR 2026 održano je u petak, 1. maja, na stadionu Sportsko-rekreativnog centra Bar na Madžarici.

Abedin Mujezinović je pobijedio u disciplini 800 metara rezultatom 1:49.29 (1048 bodova). Čestitke našim atletičarima.

LANA PUDAR NA PRIPREMAMA ZA EVROPSKO PRVENSTVO U ANTALIJI



Najbolja bosanskohercegovačka plivačica Lana Pudar je u julu mjesecu uradila završnu fazu priprema za Evropsko prvenstvo koje će se sredinom augusta održati u Parizu. Lanu Pudar u Parizu očekuje nastup na Evropskom prvenstvu nakon još jedne izuzetno uspješne sezone na prestižnom Univerzitetu Virginia u Sjedinjenim Američkim Državama, gdje je zajedno sa svojim timom osvojila naslov ekipnog prvaka NCAA prvenstva.

Završni pripremni kamp održao se u Gloria Sports Areni u Antaliji, jednom od najboljih sportskih centara u Evropi. Pod vodstvom trenera prof. dr. Damira Đedovića, uz Lanu Pudar u Antaliji se za predstojeća velika međunarodna takmičenja pripremaju i hrvatska reprezentativka i bivša BIH olimpijka Amina Kajtaž, te crnogorski olimpijac Miloš Milenković. Prof. Đedović ističe kako pripreme protiču prema planu, uz odlične uslove za rad i kvalitetan trenažni proces koji bi sportistima trebao omogućiti da u Parizu nastupe u najboljoj mogućoj formi. Bosanskohercegovačka sportska javnost s velikom pažnjom prati sve nastupe

Lane Pudar, koja je proteklih godina ostvarila historijske rezultate za bh. plivanje i postala jedna od najuspješnijih sportašica u historiji Bosne i Hercegovine. Evropsko prvenstvo u Parizu bit će još jedna prilika da bosanskohercegovačko plivanje potvrdi mjesto među evropskom elitom.

FANTASTIČAN NASTUP DŽUDO REPREZENTACIJE NA SARAJEVO EUROPEAN OPEN



Čestitke reprezentaciji BiH za fantastičan nastup na Sarajevo European Open — 1 zlatna i 3 bronzane medalje!

Zlato je osvojio Mustafa Hebib u kategoriji do 81 kg, dok su bronzne osvojili Anđela Samardžić (do 57 kg), Aleksandra Samardžić (do 70 kg) i Harun Sadiković (preko 100 kg).

Osvojeni bodovi potvrđuju odličnu formu i spremnost za predstojeće Mediteranske igre.

Olimpijski komitet čestita takmičarima, trenerima i Džudo savezu Bosne i Hercegovine na fantastičnom nastupu.

JOHANNA KLINGER BRONZANA NA EVROPSKOM JUNIORSKOM KUPU



Johanna Elisabeth Klinger je predstavljala Bosnu i Hercegovinu među 455 takmičara iz 33 zemlje na Evropskom juniorskom kupu u Pragu i donijela jedinu medalju za bh. tim.

Kao prva nositeljica pokazala je hrabrost i kvalitet.

Čestitke Johanni, njenom timu, i Judo savezu BiH, kao i svim ostalim takmičarima koji brane boje naše zemlje!

NIKOLA LUBURA BRONZANI NA EVROPSKOM KADETSKOM KUPU



Nikola Lubura je u Tbilisiju na Evropskom kadetskom kupu osvojio 3. mjesto nakon pobjeda nad Niniashvili, Kopaliani, Tchitchiashvili i Demetrashvili.

Jedinu borbu koju nije dobio je protiv Ramazanova koji je na Kupu osvojio 1. mjesto. Lubura je ovim rezultatom zadržao sjajno 6. mjesto na svjetskoj rang-listi kadeta.

Čestitke, Nikola!

BOSNA I HERCEGOVINA JE TREĆI PUT PRVAK BALKANA



Reprezentacija Bosne i Hercegovine učestvovala je na Balkanskom prvenstvu koje se održalo u periodu od 25. do 26. juna 2026. godine u Zrenjaninu i ostvarila još jedan izvanredan uspjeh, gdje je treći put proglašena Balkanskim prvakom.

Naši reprezentativci i reprezentativke pokazali su vrhunsku pripremljenost, kvalitet i timski duh, te ostvarili sljedeće ekipne plasmane po uzrasnim kategorijama:

Baby / Children I / Children II

1. Nacionalni tim Bosne i Hercegovine
2. Taekwondo Fitness (Bugarska)
3. Nacionalni tim Moldavije

Kadeti/Kadetkinje

1. Nacionalni tim Bosne i Hercegovine
2. Nacionalni tim Rumunije
3. Nacionalni tim Moldavije

Juniori/Juniorke

1. Nacionalni tim Rumunije
2. Nacionalni tim Bosne i Hercegovine
3. SC Phoenix (Bugarska)

Seniori/Seniorke

1. Nacionalni tim Albanije
2. Nacionalni tim Rumunije
3. Nacionalni tim Bosne i Hercegovine

Sveukupni plasman Balkanskog prvenstva 2026

1. Nacionalni tim Bosne i Hercegovine
2. Nacionalni tim Rumunije
3. Nacionalni tim Moldavije

Ovim rezultatom Bosna i Hercegovina je potvrdila kontinuitet vrhunskih rezultata i dominaciju na Balkanu, osvojivši naslov ukupnog pobjednika Balkanskog prvenstva treći put. Čestitke takmičarima, trenerima, klubovima i članovima stručnog štaba na izuzetnom uspjehu.

SREBRNA MEDALJA NA SVJETSKOM PRVENSTVU U HANGZHOUU



Olimpijski komitet Bosne i Hercegovine upućuje iskrene čestitke reprezentaciji Bosne i Hercegovine u sjedećoj odbojci na osvajanju srebrne medalje na Svjetskom prvenstvu u Hangzhouu!

Još jednom ste pokazali zašto ste simbol uspjeha, predanosti i sportskog ponosa naše zemlje. Put do finala bio je ispunjen vrhunskim igrama, velikim pobjedama i još jednom potvrdom da Bosna i Hercegovina pripada samom svjetskom vrhu sjedeće odbojke.

Posebne čestitke upućujemo igračima, stručnom štabu predvođenom selektorom Ifetom Mahmutovićem, Savezu sjedeće odbojke BiH, Paraolimpijskom komitetu BiH kao i svima koji su dali doprinos ovom velikom uspjehu.

Posebnu vrijednost ovom rezultatu daje i ostvareni plasman na Paraolimpijske igre Los Angeles 2028, gdje će naši paraolimpijci ponovo imati priliku predstavljati Bosnu i Hercegovinu na najvećoj svjetskoj sportskoj pozornici.

Hvala vam što dostojanstveno predstavljate Bosnu i Hercegovinu i što svojim uspjesima inspirišete nove generacije sportista.

ALEK TANKOVIĆ POBJEDOM DEBITOVAO POD ZASTAVOM BIH



Jedan od najperspektivnijih mladih umjetničkih klizača, Alek Tanković, na najbolji mogući način započeo je svoju reprezentativnu karijeru u dresu Bosne i Hercegovine. Na svom prvom međunarodnom nastupu pod zastavom BiH osvojio je prvo mjesto u ukupnom plasmanu juniorske konkurencije, čime je otvorio novo poglavlje svoje sportske karijere.

Tanković, koji je prethodnih godina nastupao za Sjedinjene Američke Države i ostvario zapažene rezultate u izuzetno jakoj američkoj konkurenciji, odnedavno predstavlja Bosnu i Hercegovinu. Do pobjede je stigao osvajanjem prvog mjesta u kratkom programu i drugog mjesta u slobodnom programu, što mu je donijelo ukupni trijumf na njegovom debitantskom nastupu u bh. dresu.

Dolazak ovako talentovanog klizača predstavlja značajno pojačanje za bosanskohercegovačko umjetničko klizanje. Riječ je o sportisti koji je već dokazao kvalitet nastupima na juniorskim prvenstvima Sjedinjenih Američkih Država, a stručna javnost smatra da pred njim stoji izuzetno perspektivna karijera i potencijal za nastupe na najvećim svjetskim takmičenjima.

Transfer sportskog državljanstva realizovan je kroz koordinaciju Klizačkog saveza Bosne i Hercegovine i Olimpijskog komiteta Bosne i Hercegovine, dok je agencija Hardino pružila organizacionu i komunikacijsku podršku u cijelom procesu.

U Klizačkom savezu Bosne i Hercegovine vjeruju kako će Alek Tanković u godinama koje dolaze biti jedan od nosilaca razvoja ovog sporta te dostojno predstavljati Bosnu i Hercegovinu na najvećim međunarodnim takmičenjima.

4. MJESTO U18 SELEKCIJI BOSNE I HERCEGOVINE U RAGBIJU



Čestitamo našim momcima iz U18 selekcije Bosne i Hercegovine na sjajnom nastupu i plasmanu na Evropskom prvenstvu u ragbiju 7 (Trophy II) u Budimpešti.

Nakon osvajanja prve pozicije u grupi A, sa pobjedama nad Srbijom (17:5) i Bugarskom (19:7), naši mladi ragbisti pružili su borbene i emotivne nastupe.

Čestitke igračima, stručnom štabu, kao i Ragbi savezu na trudu, srcu i posvećenosti.

Nastavljamo dalje.

NASTUP MUŠKE SENIORSKE REPREZENTACIJE NA EP U RAGBIJU 7

Reprezentacija Bosne i Hercegovine i ragbiju 7, seniori, nastupila je na Evropskom prvenstvu koje se održalo na Kosovu, Istog u period od 11 - 14.06.2026. godine. u okviru jakosne skupine COnference 2. U grupnoj fazi naša selekcija se susrela sa ekipama Gibraltara, Crne Gore i San Marina, te je u fazi plasma izborila 6. mjesto u utakmici protiv Crne Gore.



NASTUP ŽENSKE SENIORSKE REPREZENTACIJE NA EP U RAGBIJU 7

Nakon pauze više od 9 godina, aktivnostima unutar Ragbi saveza Bosne i Hercegovine i reaktivacijom ženskog ragbija u Bosni i Hercegovini, reprezentacija u ragbiju 7 Bosne i Hercegovine nastupila je na Evropskom prvenstvu u ragbiju 7 koje se održalo u Andori u periodu od 11 - 14.06.2026. godine. Aktivnostima na osnaživanju i popularizaciji ženskog ragbija u BiH ostvaren je uspjeh da je naša reprezentacija nastupila na ovom takmičenju. Iako rezultatski nepovoljno po našu selekciju, sam nastup je već uspjeh.



Ragbi Savez Bosne i Hercegovine implementira aktivnosti na popularizaciji ženskog ragbija u BiH.

EU PROJEKTI

ODRŽANA RADIONICA KROZ EU PROJEKAT VALUE COMPASS



National Workshop Bosnia and Herzegovina

Promoting Democratic Values in and through Sport in Europe



Sedamnaest predstavnika nacionalnih saveza, lokalnih klubova i civilnog društva sastalo se u prostorijama Olimpijskog komiteta Bosne i Hercegovine kako bi definisali kako organizovani sport može aktivno ugrađivati demokratske vrijednosti. Radionica, dio evropskog projekta VALUE COMPASS, proizvela je doprinos Bosne i Hercegovine VALUE FRAMEWORK-u — referentnom

alatu koji će pomoći sportskim organizacijama širom Evrope da integrišu demokratske vrijednosti u svoje strukture i praksu.

Format radionice i rezultati: Jednodnevna radionica kombinovala je vođene diskusije i rad u grupama. Prvi dio dana bio je posvećen predstavljanju agende i konceptualnom istraživanju veze između sporta i demokratije. U drugom dijelu učesnici su u grupama napravili mapu puta i izradili nacрте jasno definisanih, lokalno utemeljenih pojmova vrijednosti.

Rezultat: Deset demokratskih vrijednosti za sport

Učesnici su se usaglasili oko deset ključnih vrijednosti, svaka definisana u kontekstu sporta u Bosni i Hercegovini. One će se dodatno razraditi u saradnji sa Univerzitetom Bielefeld i uključiti u VALUE COMPASS alat, VALUE FRAMEWORK i VALUE GUIDE:

- Timski rad — sposobnost uspješnog rada i snalaženja u grupi.
- Integritet — držanje snažnih etičkih i moralnih principa.
- Jednakost — iste mogućnosti i standardi za sve.
- Inkluzija — omogućavanje učešća bez obzira na psihološke ili fiziološke sposobnosti.
- Pravda — pravni princip koji garantuje poštenje/podjednako postupanje i druge norme zajamčene zakonima i Deklaracijom o ljudskim pravima.
- Solidarnost — volja i sposobnost podrške članovima tima i/ili manjinama protiv vanjskih uticaja ili prijetnji kroz poštovanje dogovorenih pravila.
- Transparentnost — osiguravanje jednakog pristupa informacijama, alatima i sredstvima unutar organizacije.
- Orijentacija prema budućnosti — sposobnost sagledavanja horizonta kako bi se prepoznale i razvile potencijalne prilike, s konkretnim postignućima uključujući razmišljanje o mogućim instrumentima i budžetu.
- Nezavisnost — sposobnost funkcionisanja bez uticaja drugih ljudi i faktora.
- Poštovanje — neposredni, opći zahtjev za poštovanjem subjektivnih i objektivnih pravila unutar svake sportske zajednice; sposobnost tretiranja protivnika onako kako želimo biti tretirani.

Kompletnu vijest pročitajte na [OVOM LINKU](#).

EVROPSKA SEDMICA SPORTA I OLYMPIC DAY POČETAK #BEACTIVE KAMPANJE



doprinos manifestaciji dala je saradnja sa Sportskim igrama mladih, najvećom regionalnom amaterskom sportskom manifestacijom, koja kontinuirano promoviše prijateljstvo, inkluziju, fair-play i zdrav način života.

Ovim događajem zvanično je započela i kampanja #BeActive u okviru Evropske sedmice sporta, koja se tradicionalno obilježava od 23. do 30. septembra. Kroz ovu kampanju, Olimpijski komitet Bosne i Hercegovine nastoji dodatno podstaći djecu, mlade i širu zajednicu da usvoje zdrave životne navike, redovno se bave fizičkom aktivnošću i prepoznaju sport kao važan segment kvalitetnog i aktivnog života.

WELEAD - ODRŽAN SASTANAK PROJEKTNIH PARTNERA

We Lead je Erasmus+ sport projekt posvećen povećanju učešća žena u vodećim ulogama u sportu na lokalnoj razini. Cilj projekta je unaprijediti kapacitete sportskih klubova i organizacija za stvaranje inkluzivnijeg okruženja kako bi osnažio žene — posebno nezaposlene — da kroz sport razvijaju leaderske, upravljačke i organizacijske vještine. Partneri projekta sastali su se u Kući sportova u Beču kako bi nastavili zajednički rad na jačanju ženskog liderstva u sportu. WeLead potiče saradnju između programskih zemalja EU (Italija i Austrija) i zemalja Zapadnog Balkana (Bosna i Hercegovina i Crna Gora), omogućujući razmjenu znanja i dobrih praksi usmjerenih na rodnu ravnopravnost u sportskom vodstvu u različitim nacionalnim kontekstima.

Sastanak je bio prilika za razmjenu ideja, usklađivanje narednih projektnih koraka i daljnji razvoj zajedničkih aktivnosti. Kroz produktivne rasprave i snažnu saradnju, partneri nastavljaju raditi na konkretnim mjerama za osnaživanje žena u sportu diljem Evrope.

Olimpijski komitet Bosne i Hercegovine, u saradnji sa Sportskim igrama mladih, organizovao je manifestaciju „Olympic Day 2026“ s ciljem promocije olimpijskih vrijednosti, zdravog načina života i važnosti bavljenja sportom među djecom i mladima. Na ovogodišnjem događaju učestvovalo je 200 osnovaca iz cijele Bosne i Hercegovine. Poseban

Co-funded by
the European Union

WELEAD Meeting Haus des Sports Vienna

Project Partners

CSIT AICS UCC WB

Olimpijski komitet
Bosne i Hercegovine

SAFEHARBOUR - ODRŽAN SASTANAK PROJEKTNIH PARTNERA



Predstavnici Olimpijskog komiteta BIH učestvovali su na trećem projektnom sastanku SAFE HARBOUR, održanom 29. i 30. juna 2026. godine u Frankfurtu, u organizaciji EOC EU kancelarije i Njemačkog olimpijskog komiteta (DOSB).

Prvog dana sastanka predstavljen je napredak na projektu, uključujući ažurirani GAP izvještaj i klasifikaciju bezbjednosnih pitanja. Posebna pažnja posvećena je izradi Evropskog okvira za odgovor (European Response Framework) kroz tematske seminare i definisanje zajedničkih standarda u okviru radnog paketa 3, dok je drugi dio programa obuhvatio i diskusiju o uspostavljanju Evropske mreže za bezbjedan sport (European Network for Safe Sports).

Drugog dana održana je radionica posvećena nacionalnim strategijama, sa teorijskim okvirom i praktičnim sesijama izrade strategija, nakon čega je uslijedila razmjena dobrih praksi i izazova u oblasti zaštite u sportu širom Evrope. Sastanak je zatvoren pregledom narednih koraka projekta.

SAFE HARBOUR je projekat sufinansiran od strane Evropske komisije kroz program Erasmus+, koji ima za cilj jačanje kapaciteta evropskog sportskog pokreta za odgovor na bezbjednosne izazove i povrede u sportu.

Konzorcijum okuplja međunarodne federacije, evropske nacionalne olimpijske komitete, Međunarodni olimpijski komitet, kao i istraživače instituta Thomas More i Asser Institute.

Više pročitajte na zvaničnoj stranici projekta: [LINK](#)



IN MEMORIAM EDIN NUMANKADIĆ

Čuvar olimpijskog plamena i vječni simbol sarajevskog duha

Odlaskom Edina Numankadića, Bosna i Hercegovina nije izgubila samo jednog od svojih najznačajnijih likovnih umjetnika, već i čovjeka koji je čitav svoj životni vijek utkao u temelje sjećanja na najljepše dane našeg grada i države. Sa punim pravom i ponosom možemo reći – Edo je bio i ostao vrhovni čuvar uspomena na sarajevsku Olimpijadu 1984. godine.

Životni poziv između umjetnosti i olimpizma

Iako je međunarodno priznat kao vizionarski likovni umjetnik, Edin je većinu svog radnog vijeka proveo u ulozi direktora Muzeja XIV Zimskih olimpijskih igara u Sarajevu. Ta uloga za njega nije bila posao, već sudbina. Odmah nakon završetka Igara, 19. februara 1984. godine, zvanično je otvoren Muzej XIV ZOI kako bi baštiniio uspomenu na te veličanstvene dane, a čast da vodi ovu prelijepu kuću sporta i umjetnosti zasluženno je pripala našem Edi.

Hrabrost pod vatrom i odanost bez granica

Ulozi čuvara Muzeja ostao je vjeran do posljednjeg dana, prolazeći kroz najteže periode koje jedan kulturni radnik može zamisliti. Kada je 1992. godine Muzej u Vili Mandić planuo pod granatama, Edin nije posustao. Gledajući kako muzej gori, on je sa nekolicinom saradnika, u nevjerovatno opasnim i turbulentnim okolnostima, uspio spasiti veliki broj eksponata. Ti predmeti, koji su za Sarajevo značili život, tada su sklonjeni na sigurno, u skladište OC Zetra, zahvaljujući njegovoj prisebnosti i ljubavi prema gradu.

San o povratku u Petrakijinu ulicu

Edo je decenijama nosio olimpijski duh kroz izbjeglištvo i privremene prostore. Njegova velika želja bila je da se olimpijsko blago vrati tamo gdje pripada. Prvi korak bio je otvaranje privremenog muzeja 2004. godine u prostorijama Olimpijskog komiteta BiH, ali njegov istinski trijumf uslijedio je 2020. godine. Dočekao je, sa suzama radosnicama, obnovu i ponovno otvaranje Olimpijskog muzeja u originalnoj, velelepnoj zgradi u Petrakijinoj ulici.

Priznanje svjetske javnosti i vječni trag




Njegov rad prepoznao je i svijet. Na prijedlog Olimpijskog komiteta BiH, Edin Numankadić je 2013. godine postao dobitnik prestižne nagrade "Pjer de Kuberten" (Pierre de Coubertin), koju dodjeljuje Međunarodni olimpijski komitet. To je bila potvrda da je njegova borba za očuvanje univerzalnih olimpijskih vrijednosti prešla granice naše zemlje.

Skoro četiri decenije, naš dragi Edo je vrijedno radio na promociji i očuvanju najljepših momenata naše prošlosti. Starao se da sjećanje na olimpijsko naslijeđe Bosne i Hercegovine i olimpijski duh nastavi da živi u srcima svih Bosanaca i Hercegovaca.

Kao umjetnik, predstavljao nas je na Venecijanskom bijenalu, donoseći svijetu našu bol i našu nadu. Kao direktor, sačuvao je naš ponos. Njegovim odlaskom ostaje praznina, ali ostaje i Muzej – kao živi spomenik jednom čovjeku koji je znao da su uspomene najvrijednije što posjedujemo.



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2026. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

